

20 NOV 2015

Varmárskóli, 16. nóvember 2015.

23.0

Áskorun til bæjarstjórnar Mosfellsbæjar:

Í Varmárskóla er starfandi virk umhverfisnefnd. Bæði kennarar og nemendur funda reglulega enda er Varmárskóli Grænánaskóli. Skólinn er vel staðsettur hvað útikennslu snertir. Varmá og ævintýragarður í næsta nágrenni, fjöll og fjara. Útielldhús, garðlönd og garðkofi gegna stóru hlutverki í þessu uppbyggilega starfi.

Þegar vegur var lagður frá skólanum niður að útielldhúsinu þurfti að taka upp nokkur stór og stæðileg grenitré. Þau voru tekin með gröfu og sett með rótarhnaus til hliðar. Þar standa þau enn og munu smámsaman veslast upp. Þar fara talsverð verðmæti forgörðum. Þessi tré myndu koma vel að gagni fyrir austan útielldhúsið til að skapa þar meira skjól. Það vantar bara menn og vélar til að koma því í framkvæmd. Auk þess er Skógræktarfélag Mosfellsbæjar tilbúið að gefa tré til verkefnisins.

Garðlöndin austan við skólann höfum við undanfarin ár nýtt til kartöfluræktar með nemendum og náum við að setja niður kartöflurnar rétt áður en sumarfríð byrjar og taka þær upp í upphafi skólaárs. Það að kenna nemendum garðrækt teljum við mjög uppbyggjandi, gefandi og í anda sjálfbærrar þróunar sem er ein af grunnstöðum menntunar. Þannig væri mjög æskilegt að áhugasöm börn gætu fengið tækifæri yfir sumartímann að rækta grænmeti undir handleiðslu fagfólks og gætu ungmenni í sumarvinnu vel aðstoðað við þetta. Við óskum eftir því að tilraun verði gerð með skólagarðana í boði bæjarins yfir sumartímann frá og með næsta sumri.

Síðastliðið vor átti sá sorglegi atburður sér stað að útikennslustofan varð að miklu leyti eldi að bráð ásamt gögnum, kennsluefni og jafnvel persónulegum munum kennara. Starf margra ára var lagt í rúst. Seint verður það tjón bætt. Nú vildum við gjarnan fá aðstoð frá bænum hvað enduruppbyggingu og viðhald útikennslusvæðis varðar þannig að starf okkar þar geti haldið áfram.

Við æskjum þess að fá fljótlega fund fyrir starfsmenn skólanna um umhverfismál og sjálfbæra þróun. Við skorum á bæjarstjórn Mosfellsbæjar að styrkja umhverfismál Varmárskóla með markvissum hætti og auknu fjármagni.

Umhverfisnefnd Varmárskóla

(Afrit sent á Umhverfisnefnd Mosfellsbæjar)